

SARS E ANANELA KAHLOLO YA MONG. LUCKY MONTANA

Tshwane, 17 Mphalane 2025 — Ditshebeletso tsa Lekgetho tsa Afrika Borwa (SARS) di ananela kahlolo e dumellanang le tsona e dihlweng ka la 17 Mphalane 2025 ke Lekgotla le Phahameng la Afrika Borwa, Gauteng (nyeweng ya nomoro ya 2023-047735). Qeto ena e tlile ho latela kopo e tlisitsweng ke SARS hore ho be le kgapo e molaong ya thepa ya Mong. Tshepo Montana.

Ka la 5 Phuptjane 2024, Mong. Montana o ile a faela tsebiso le afidafiti ya motheo e batlang hore a fuwe tshwarelo bakeng sa ho fana ka afidafiti ya hae e arabelang ka morao ho nako tabeng ena e mabapi le kgapo e molaong ya thepa. Ho latela seo, ka la 14 Phato 2024, SARS e ile ya kenya kopo ya ho qhelela ka thoko kopo eo, ho latela dintlha tsa Molao wa 6(5) wa Melao e Tshwanang ya Lekgotla, ka lebaka la hore afidafiti ya motheo ya Mong. Montana e ne e kentse tse neng di hloka motheo le tse neng di batla ho fehla maikutlo feela.

Ka la 21 Phupu 2025, Lekgotla le dumellane le kopo ya SARS ya ho qhelela ka thoko kopo ya Mong. Montana ya tshwarelo le hore a lefe ditjeo. Mong. Montana ka mora moo o ile a etsa kopo ya ho ipiletsa kgahlano le kahlolo ena. Taba ena e ile ya dulelwa ka la 17 Mphalane 2025 mme kopo ena ya ho ipiletsa e ile ya qhelelwa ka thoko mme sena se tsamaisana le ditjeo tsa yona.

Maikemisetso a mawala a SARS ke ho kgothaletsa tlwaelo ya boikobelo ba tefo ya lekgetho ka boithaopo. Ho etsa sena, mokgatlo o fana ka tlhakisetso le nnetefaletso ho balefalekgetho mabapi le boitlamo ba bona ba molao mme o tswela pele ho ba nolofaletsa le ho etsa hore boikobelo bo thelle feela ka tshebediso ya dikanale tsa sejwalejwale, le tse kgontshang tsena tsa dijithale. Ka mokgwa o sa tshwaneng, SARS e nnetefatsa hore ho se ikobele ho ba thata le ho ba ditjeo tse hodimo bakeng sa bao ba etsang ka boomo ho se natse boikarabelo ba bona ba lekgetho.

Ha a ne a ntsha maikutlo ka taba ena, Khomishenara ya SARS Edward Kieswetter o itse:

"SARS e ananela hore bongata ba balefalekgetho ba a tshepahala ebile ba batla ho etsa se nepahetseng ka ho ikobela boitlamo ba bona ba ngodiso, ho faela le ho lefa boitlamo ba ditefo tsa bona. Ho latela thomo ya SARS ya ho bokella lekgetho lohle le lokelang ho ba mokotleng wa naha, re tla etsa tsohle tse matleng a rona le tse molaong ho phethahatsa thomo ena. Ka ho etsa seo, kamehla SARS e tla hlompha tokelo ya balefalekgetho ya ho sebedisa le ho phethahatsa ditokelo tsa bona tse nnetefaditsweng ke molao wa motheo tsa ho leba makgotleng ho ya batla thuso efe kapa efe eo ba e batlang. SARS e kgolwa hore Mafrikaborwa ohle a lekana pela molao, mme mokgatlo le ona o tlangwa ke molao ho phethahatsa dipehelo tsa ona ntle le tsela e nang le tshabo, leeme kapa e inkelang diqeto" ."

SARS e ke ke ya ntsha maikutlo afe kapa afe mabapi le taba ena.

Bakeng sa dipotso tsa bophatlalatsi ba ditaba, ka kopo ikopanye le
SARSMedia@sars.gov.za

KE PHETHO